



EEU- სტუდენტთათვის სტიპენდიის გაცემისა და წახალისებების წესი



*დამტკიცებულია: უნივერსიტეტის რექტორის 2022 წლის 28
აპრილის ბრძანებით №10/01-01*

მუხლი 1. ზოგადი დებულებანი

1. „სტუდენტთათვის სტიპენდიის გაცემისა და წახალისებების წესი“ (შემდგომში – „წესი“) არეგულირებს შპს აღმოსავლეთ ევროპის უნივერსიტეტის სტუდენტებისათვის სტიპენდიის და სხვა სახის წახალისების ღონისძიებების განსაზღვრისა და გაცემის პროცედურებს.
2. წინამდებარე წესის მიზანია სტუდენტთა მოტივაციის გაზრდა, კონკურენტული გარემოს შექმნა, სტუდენტური ცხოვრების გაუმჯობესება და ხელშეწყობა.

მუხლი 2. სტიპენდიისა და წახალისების სახეები

1. უნივერსიტეტში მოქმედებს:
 - ა) საუნივერსიტეტო სტიპენდია საბაკალავრო, ინტეგრირებული და სამაგისტრო პროგრამების სტუდენტებისთვის;
 - ბ) სასწავლო გრანტი;
 - გ) წარჩინებულ სკოლადამთავრებულთა სტიპენდია;
 - დ) ერთჯერადი ჯილდო და სხვა სახის ინდივიდუალური წახალისებები;
2. საუნივერსიტეტო სტიპენდიას სტუდენტი მოიპოვებს ყოველსემესტრულად მიღწეული შედეგების საფუძველზე. სტიპენდია მოქმედებს ერთი სემესტრის განმავლობაში და განისაზღვრება 600 (ექვსასი) ლარის ოდენობით;
3. სასწავლო გრანტი გაიცემა შემდეგ სამიზნე ჯგუფებზე:
 - ა) სოციალურად დაუცველ პირებზე;
 - ბ) ეთნიკურად ქართველ უცხო ქვეყნის მოქალაქეებზე (ლაზები, ფერეიდნელი ქართველები და სხვა);
 - გ) სტიქიური უბედურების შედეგად დაზარალებულ პირებზე;
 - დ) სხვა ცალკეულ შემთხვევაში რექტორის გადაწყვეტილებით;
4. ბაკალავრიატის სტუდენტი, რომელსაც სრული ზოგადი განათლება დასრულებული აქვს ოქროს ან ვერცხლის მედალზე, სარგებლობს უნივერსიტეტის სტიპენდიით.
5. ერთჯერადი ჯილდო გაიცემა სტუდენტის მიერ საუნივერსიტეტო ცხოვრებაში გამოჩენილი განსაკუთრებული აქტივობისთვის (უნივერსიტეტის წარმოჩენა სპორტულ, კულტურულ, ინტელექტუალურ კონკურსებში, გამოფენებში, სამეცნიერო კონფერენციებში და ა.შ.)

6. უნივერსიტეტის რექტორი საკუთარი ინიციატივით ან ფაკულტეტის, სტუდენტური თვითმმართველობის დასაბუთებული მიმართვის საფუძველზე ახორციელებს სხვადასხვა სახის ინდივიდუალურ წამახალისებელ ღონისძიებებს, რომლებიც ემსახურება სტუდენტური ცხოვრების გაუმჯობესებას და მოტივაციის ზრდას.

მუხლი 3. სტიპენდიის დანიშვნის პროცედურა და შეფასების კრიტერიუმები

1. საუნივერსიტეტო სტიპენდიით სტუდენტთა დაფინანსება ხორციელდება სტუდენტის აკადემიური მოსწრების, სტუდენტურ საუნივერსიტეტო აქტივობებში აქტიური მონაწილეობისა და სასწავლო-სამეცნიერო აქტივობებში ჩართულობის საფუძველზე;
2. საუნივერსიტეტო სტიპენდია არ გაცემა:
 - ა) სტიპენდიის მიღების სასწავლო წელს სტუდენტის სტატუსის შეწყვეტის/ხარისხის მინიჭების შემთხვევაში;
 - ბ) წინა სასწავლო წლის გაზაფხულის/შემოდგომის სემესტრში მობილობით გადმოსულ სტუდენტზე;
 - გ) დამატებითი სემესტრის სტუდენტზე;
 - დ) სტუდენტზე, რომელსაც რეგისტრირებული ჰქონდა საგანმანათლებლო პროგრამით სემესტრულად განსაზღვრული კრედიტების რაოდენობაზე ნაკლები კრედიტი;
3. აკადემიური მოსწრება გამოითვლება სტუდენტის მიერ უნივერსიტეტში წინა სასწავლო სემესტრის განმავლობაში, საგანმანათლებლო პროგრამით სემესტრულად განსაზღვრული კრედიტების სავალდებულო რაოდენობის სასწავლო კურსებში მიღებული ქულების საშუალო შეწონილი ქულით (GPA).
4. საუნივერსიტეტო სტიპენდიის მიღების შესაძლებლობა ამ მუხლის 1-ელი და მე-2 პუნქტების გათვალისწინებით აქვს სტუდენტს, რომლის სემესტრული GPA (საშუალო შეწონილი ქულა) არის 3,5 და მეტი; სტუდენტურ საუნივერსიტეტო აქტივობებში მიღებული მინიმალური შეფასება არის არანაკლებ 2 ქულა; სასწავლო-სამეცნიერო აქტივობებში მონაწილეობის მიღებული მინიმალური შეფასება არის არანაკლებ 2 ქულა.
5. აქტივობა, რომელიც განხორციელდება სასწავლო სემესტრის დასრულების შემდგომ და ახალი სემესტრის დაწყებამდე, სტუდენტს ჩაეთვლება წინა სასწავლო სემესტრში განხორციელებულ აქტივობაში მონაწილეობად.

6. საუნივერსიტეტო სტიპენდიის დანიშვნისთვის ფაკულტეტის დეკანის მიერ დგინდება საუნივერსიტეტო და სასწავლო-სამეცნიერო სტუდენტური აქტივობების პრიორიტეტული ჩამონათვალი და მინიჭებული ქულები.
7. საუნივერსიტეტო სტიპენდიის დანიშვნა ხდება ქულების რანჟირების მიხედვით (მაქსიმუმ 4 ქულა და მინიმუმ 3.05 ქულა), რომლის კრიტერიუმები დადგენილია შემდეგი სახით:
- ა) აკადემიური მოსწრების შედეგები განისაზღვრება საშუალო შეწონილი ქულით GPA, რაც მრავლდება 0,7-ზე.
- ბ) სტუდენტის მონაწილეობა სტუდენტურ საუნივერსიტეტო აქტივობებში (საჯარო ლექცია, სემინარი, კულტურულ-საგანმანათლებლო ღონისძიებები და სხვა) მაქსიმუმ 4 ქულა, რაც მრავლდება 0.1-ზე.
- გ) სტუდენტის მონაწილეობა სასწავლო-სამეცნიერო აქტივობებში (კონფერენცია, გაცვლითი პროექტები, სტუდენტური პროექტები, იმიტირებული პროცესები, პუბლიკაციები და სხვა) მაქსიმუმ 4 ქულა, რაც მრავლდება 0,2-ზე.
8. საუნივერსიტეტო და სასწავლო-სამეცნიერო სტუდენტურ აქტივობებში სტუდენტთა ყოველსემესტრულ აღრიცხვას ახორციელებს შესაბამისი ფაკულტეტი. ფაკულტეტის მიერ დგინდება საუნივერსიტეტო სტიპენდიატთა სია, რომელსაც განათლების დეპარტამენტი განიხილავს ამ წესის მე-3 მუხლის მე-2, მე-3, მე-4, მე-5, მე-7 პუნქტებით განსაზღვრულ კრიტერიუმებთან შესაბამისობაში. სტიპენდიატთა საბოლოო სია მტკიცდება რექტორის ბრძანებით.
9. **სასწავლო გრანტის** მოპოვების მიზნით, მე-2 მუხლის მე-3 პუნქტით გათვალისწინებულმა პირებმა განცხადებით უნდა მიმართონ უნივერსიტეტის რექტორს და წარმოადგინონ შესაბამისი დოკუმენტაცია. სასწავლო გრანტის ოდენობა განისაზღვრება ყოველ კონკრეტულ შემთხვევაში ინდივიდუალურად, ფაკულტეტის დეკანის წარდგინების საფუძველზე რექტორის მიერ ბრძანების გამოცემის გზით;
10. სტუდენტები, რომელთაც სრული ზოგადი განათლება დასრულებული აქვთ ოქროს ან ვერცხლის მედალზე, **წარჩინებულ სკოლადამთავრებულთა სტიპენდიის მოპოვების მიზნით**, უნივერსიტეტში ჩარიცხვიდან ერთი თვის ვადაში განცხადებით უნდა მიმართონ რექტორს და წარმოადგინონ უფლებამოსილი ორგანოს მიერ გაცემული სერტიფიკატი ან ცნობა მედლის გაცემის შესახებ.

11. რექტორის ბრძანებით წარჩინებულ სკოლადამთავრებულ სტუდენტებს სტიპენდია უწესდებათ და უნარჩუნდებათ პროგრამის ხანგრძლივობის ვადით, თუ ყოველ სემესტრში საშუალო შეწონილი ქულა (GPA) აქვს 3.0 ან მეტი.

ა) ოქროს მედალოსანი სტუდენტი - სწავლის საფასურის 20% დაფინანსება;

ბ) ვერცხლის მედალოსანი სტუდენტი - სწავლის საფასურის 10% დაფინანსება;

12. ერთჯერადი ჯილდო მოიპოვება სტუდენტის მიერ საუნივერსიტეტო ცხოვრებაში გამოჩენილი განსაკუთრებული აქტივობისთვის (მაგალითად, უნივერსიტეტის წარმოჩენა სპორტულ, კულტურულ, ინტელექტუალურ კონკურსებში, გამოფენებში, სამეცნიერო კონფერენციებში და ა.შ.); უნივერსიტეტის რექტორი სტუდენტური თვითმმართველობის პრეზიდენტის ან ფაკულტეტის დასაბუთებული წარდგინების საფუძველზე განსაზღვრავს ერთჯერადი ჯილდოს მიმღებსა და ჯილდოს სახეს.

მუხლი 4. დასკვნითი დებულებები

1. წესს ამტკიცებს უნივერსიტეტის რექტორი ბრძანებით.
2. აღმოსავლეთ ევროპის უნივერსიტეტში სტუდენტთათვის სტიპენდიის გაცემისა და წახალისებების წესში ცვლილებების შეტანა ხორციელდება უნივერსიტეტის რექტორის ბრძანებით.

